

## Cargamento di explosivo a desaparece

DEN HAAG/WIL-LEMSTAD/ORANJESTAD (AAN) Di fuentenan cu ta hopi bon na altura a confirma un noticia cu un cargamento di explosivo cu a ser horta abordo di un barco di guerra, e noticia aki pa basta dia caba DIARIO no por a haya su confirmacion.

Ta asina cu algun siman pasa un barco di guerra Hulandes a sali for di Hulanda cu cargamento di materialnan pa guerra pa Marina Real na Aruba y Curacao.

Durante control cu a ser haci

abordo di e barco a sali na cla cu falta un caha di explosivo di alto potencia.

Investigacion profundo a ser haci pa averigua unda e cargamento a keda, kende por a horta y pa cual mision y mas ainda cu actualmente ta mundo ta den amenasa di guerra.

Ministerio di Defensa Hulandes a ser notifica di e cargamento perdi.

Na Aruba ningun autoridad kier duna informacion riba e cargamento cu a ser horta.

## 7 Mil Florin a desaparece

ORANJESTAD(AAN) -- Casonan di robo ta aumentando na Aruba. Ultimamente Recherche ta worde confronta cu masha hopi caso. Ta asina cu tin casonan cu te ainda no a worde resolvi.

Manera por corda, aña pasa un serie di atraco arma a tuma lugar. Un di e lugarnan tabata e supermercado Pueblo na Ponton caminda 5 Mil Florin a ser horta.

E cahera, kende a bira e victima di e atraco arma, a duna di conoce na e miembronan di Recherche cu e atracadornan ta di habla Spaño. E caso aki te ainda no a worde resolvi.

Ta asina cu tin biaha miembronan di Recherche ta detene un persona y durante interrogacion e ta basha abao di a comete un serie di robo.

Diamars pa mas o menos 8.30 or di mainta, e turista R.C.(42) a entrega keho di robo di 7 Mil Florin for su carson.

El a splica e miembronan di Recherche cu e tabata sinta den un cocktail lounge situa riba Boulevard, cu e placa den su carson.

El a sigui bisa cu ningun momento el a sinti nada pero ora el a bandona e lugar el a sinti falta di 7 Mil Florin. E caso ta bao investigacion.

## Tele Aruba lo ta cera Diabierna

ORANJESTAD (AAN): Relaciona cu fayecimento di Ministro Trinidad, por a nota mesora cu emisoran radial na Aruba a cambia nan programacion mesora, y a cuminsa pasa musica clasico como un tributo na e fayecido.

A algun emisora a continua normalmente cu su ministracion di noticia, specialmente e parti di acontecimentonan entorno e crisis den Golfo Persico.

Segun DIARIO a compronde, TeleAruba tambe a cambia algun programa di nan pa awe. Por ehemplo informenan ricibi ta indica cu e programa Aruba's Video

Cuisine, esta esun di MTV Internacional a keda cancela y lo no pasa awenochi. E transmision di programan di CNN si ta continua, ya cu e ta un di e fuentenan di informe cu pueblo a costumbra hopi di dje.

Ayeru madrugada laat por a mira con claridad tabata sali for di basta sala y camber di casnan na Aruba. Mester bisa cu sin duda alguno hopi televidente a keda mira CNN via TeleAruba te 3'or di madrugada.

Den un combersacion cu DIARIO tabata tin cu TeleAruba, nan a informa cu mañan e planta televisora lo ta cera henter dia, pa motibo di luto.

## E mihor ora pa ataque

ORANJESTAD (AAN): Hopi hende no por a kere cu e ataque Mericano a cuminsa ayeranochi. Na prome instante a kere cu ya tabata birando laat pa aliadonan cuminsa cu un ataque, pero pa 3:00 a.m. (ora di Iraq) e Mericanonan a pensa cu ta e mihor ora.

# Carnaval posponi

ORANJESTAD (AAN): Dos cos cu hopi hende kizas ta contra... a sosode ayeranochi: E ataque di aliadonan riba Iraq, y e posponemento di Carnaval.

Encuanto Carnaval, segun DIARIO a compronde algun dia pasa ya caba Stichting Arubaanse Carnaval (SAC) y Gobierno a reuni encuanto posible posponemento di e actividadnan carnavalesco si acaso guerra estaya.

Diamars anochi, na momento cu e noticia di fayecimento di Ministro Guillermo

Trinidad a ser anuncia, mesora e informe a drenta cu actividadnan di Carnaval, incluso e Contest di Calypso andando e momentonan ey, lo ser posponi.

Ayeru mainta Gobierno a informa oficialmente cu Ministro Trinidad lo ser dera Diasabra, y como tal Carnaval a ser posponi di Diarazon te Diasabra. SAC a informa cu Carnaval lo sigui su curso Diadomingo.

Pero ayeranochi 8'or, combatenan a cuminsa na Medio

Oriente, y esaki a activa e plan pa pospone Carnaval tanten cu tin guerra. Den un combersacion di DIARIO ayeranochi cu Milo Croes, el a indica cu berdaderamente "Carnaval a keda posponi te proximo aviso".

Akinan el a agrega cu e proximo aviso aki por ser duna mas prome cu hopi hende ta kere, indicando riba e 'guerra' cu por caba den un rato.

Pues en corto: NO CARNAVAL.

## Tabata tin gran admiracion pa Guillermo Trinidad

ORANJESTAD (AAN): Diferente gobernante y personanan prominente di nos comunidad a expresa lamentu pa e desaparicion di un gran persona, Ministro Guillermo Trinidad.

"Un gran perdida" tabata un di e expresionnan cu por a ser tendi mas. Sin duda alguno e persona tabata goza di gran respet y admiracion den nos comunidad.

Guillermo Prospero Trinidad sin duda alguno a traha cu yen di amor den mundo di politica y ademas tabata un ehemplo pa hopi joven kendenan a drenta e arena politico.

Lidernan di oposicion ayera a lamenta hopi mes e perdida aki, y hopi a muestra di no por a kere e noticia na prome instante.

Entierro di Guillermo lo ta Diasabra awor y riba Plaza Betico Croes pueblo por bay bisa nan ultimo adios na e Ministro aki, q.e.p.d.

*Caso increíble y inhumano a keda presenta na DIARIO ayera*

## Ciudadano no por haya carchi di dokter pasobra e no por subi trapi

*Mientras dokter no dune permiso pa subi trapi e por muri si e bira malo*

ORANJESTAD(AAN)--

Tur hende ta papia di abusonan na Medio Oriente y sentido di poder, cu a pone mundo na rand di guerra mundial. Pero na Aruba tambe sentido di poder ta crea situacionnan di abuso, contra personanan, cu hende ta pensa cu nan no por defende nan mes.

"Mi a dicidi di acerca DIARIO pa asina laga DIARIO expone e caso aki pami," un ciudadana a bisa ayera. Segun Ley, personanan cu no tin placa pa paga pa nan cuido medico, por haya un carchi di dokter. Asina e gastonan di dokter ta worde cubri cu placa di pagadornan di belasting y no placa di hendenan cu ta sinti nan mes poderoso, pasobra nan ta ocupa cierto funcion.

E ciudadana aki ta bini na remarke pa un carchi di dokter, cu ayera el a bay busca na e oficianan di Gobierno cu ta atende cu e asunto aki. E oficianan ta keda den e edificio di Biblioteca Nacional na San Nicolas, caminda ya pa hopi tempo e lift ta kibra.

E solo hecho cu a laga asina tanto tempo pasa pa drecha e lift,

ta causa disgusto. Mester tene cuenta cu esnan cu bay busca un carchi di dokter ta hende malo, cu hopi biaha tin problema cu subimento di trapi. Pero aparentemente e condicion di hende no ta problema ni pa Gobierno ni pa personal.

Aunke tin hopi oficina cu por worde ocupa pa esnan cu ta atende cu asunto di carchi di dokter na San Nicolas a opta pa keda na e segundo piso di e edificio y esnan cu kier carchi di dokter mester subi trapi.

E ciudadana en cuestion ta un persona, cu a haci un operacion grandi algun tempo pasa. Dokter a prohibe determinadamente pa subi trapi, como cu esaki por cause problema grandi.

Ayeru ora a bay laga stempel su carchi, el a worde presenta atrobe cu e lift dañá. Incapaz pa subi trapi, el a pidi e guardia di e edificio pa pidi e miembro di personal cu ta atende cu e asunto aki, pa atende su caso y si ta posible baha un rato pa e por completa formularionan.

Grandi tabata su sorpresa ora e guardia a regresa cu e mensahe, cu e mes mester subi e

trapi y si e no por cana, e mester subi cu man y pia. E ciudadano a haya un bofa den su cara, pero aparentemente nada por a conmove e miembro de personal, cu por cierto ta ricibi su placa for di fondo di pagador di belasting, pa bay duna un man na un persona den necesidad.

Final di e storia tabata, cu e ciudadana mester a regresa cas sin e carchi gestempel. Si e mester bira malo, e mester muri numa, pasobra mientras dokter no dune permiso pa subi trapi, e no por haya e carchi pa asina e por ricibi e tratamiento medico, cu e mes no por paga.

Esaki a bira otro di e casonan inhumano cu ta keda registra mas y mas na Aruba. Ainda ta fresco den memoria e caso di e homber, cu a sufri un infarto y mester a keda horanan en espera di un ambulance, pasobra ta dokter so por yama ambulance.

A bira tempo pa hende realiza, cu cada hende tin nan puesto, no pa acumula poder cu ta bula bay hopi liber, pero pa sirbi comunidad, especialmente ora ta comunidad ta paga e sueldonan!